

Ni Chivinti yu Jalaqts'oqnil Pablo Ixlapanakni Dios yu Tavilanal Colosas

Ni Pablo jalakmastak'ay ixlapanakni
Dios yu tavilanal Colosas

1 ¹ Kit'in kPablo ixtamalaqachan Jesucristo kunita va por chuncha naul ni Dios. Aniy ch'antaun ikt'avil kilaqajk'an Timoteo. ² Klamastak'ayau ni uxiknank'an ket'alaqaunin yu vilanant'ik laka putaulan Colosas yu ixlapanakni Dios unt'at'ik. Ox t'aylhip'inat'ik ch'an-taun kun Cristo. Katamayaynin y oxamaktaun katamakan ni kimPay Diosk'an ali kiJalhachimo'onuk'an Jesucristo.

Ni Pablo sk'in Dios por yu'uncha

³ Si iktapayninyau por uxiknan, vachu' ikxtaqniyau lhimalaqpuchuncha ni kimPayk'an Dios ali kiJalhachimo'onuk'an Jesucristo por uxiknan. ⁴ Ijqasmakvi ni ox lhakp'axk'ayat'ik ni Cristo Jesús y ox jalakp'axk'ayat'ik tachun ixlapanakni Dios. ⁵ Chuncha mak'ayat'ik va por alin yu p'axkan'iyat'ik. Yucha Dios talhilka-ma'anitan lakt'iyau. Va chuncha lanit'ik tejkan asmakt'ik ni ox chivinti yu laqsaval, yu lhichiviniy tas lay k'ap'ulaqt'axt'ut'ik. ⁶ Ni anchanu ox chivinti cha'al tus ta'an vilanant'ik, va tacha ajin tus ta'akchun ni lakamunukpa' y lhiyajachal yu laj'ox. Vachu chun val kun uxiknank'an ni anchanu julchan tejkan asmakt'ik y laqsaval misp'at'ik ixjamapayninti Dios. ⁷ Chuncha tamalanin Epafras yu k'achaniyau ali yu kintat'atapatsayan. Yucha ox tapatsaniy ni Cristo para kata'aqtayjun. ⁸ Yucha vachu kintapute'enin tacha ni Espiritu Santo tamakayan para k'alap'axk'at'ik.

⁹ Xlhiyucha, tejkan p'unaj chuncha ijqasmakvi tus chavaycha, jantu aqtaun ikmakaunau isk'inka Dios por uxiknan. Iktapayninyau para k'amisp'a'ot'ik yu

Dios lhinajun. Chuncha k'amala'asit'ik yu ox jatapastak'ati yu minachal kun ni Espiritu Santo. ¹⁰ Chuncha ksk'inau Dios para kat'i'ukxunt'ayat'ik tacha tapa-xtoqniy ixlapanakni kiJalhachimo'onuk'an, ex chuncha kalhipa'inil Dios. Ex ox kaxajchal tachun yu ox mak'ayat'ik. Va chuncha katalhaval ixmispaka Dios la metsukuntik'an. ¹¹ Vachu' iksk'inau para k'alhits'uk'ut'ik tachun tap'asta yu minachal kun yu la ay ixtap'asta Dios. Ex lay k'at'ayanit'ik va tisuncha kaval y uxama'ay k'a'unt'ik. ¹² Chuncha kun achati kaxt'aqnit'ik lhimalaqpuchuncha ni kimPay Diosk'an. Yucha kintala'oxinitancha ketsukuntik'an para vachu kalaqa'iu yu kalaqxtaqniya' ixlapanakni ta'an jamapulakunti. ¹³ Kintamaxtutancha ta'an ixlhachimo'onun ni xa'ukxtin japuts'isni' y kintalhilha'an ta'an lhachimo'onun isTs'al yu la achaniy. ¹⁴ Yucha kintalhi'in ixjak'alna y chuncha malaqmixi'ol kintalaqalhink'an.

Vamun Cristo yu ay

¹⁵ La ixjatsukunti ni Cristo tasuy ni Dios yu jantu laqts'inkan. Yucha aqts'iyaj ixlhi'alincha y chuncha va tacha sa'oqsna junita tachun yu alin. ¹⁶ Va yucha makal tachun yu alin lakt'iyau ali yu alin lakamunukpa', yu laqts'inkan ali yu jantu laqts'inkan, kaval xa'ukxtinin lakamunukpa', kaval angeles, kaval yu talhachimo'onun, kaval yu talhit'ajun tap'asta, va tu'uchun kavalcha. Tachun va yucha jalakmakal para ixnavin kaval. ¹⁷ Yucha aqts'iyajcha ixlhi'alincha y yu alati va astan. Va por yucha la ox ch'atay tachun yu alin. ¹⁸ Yucha junita sa'aqtsul ni kijnan tachun yu lhakapu'anau. Kijnan va tacha ixlakatunaj kajuu. Yucha pu'aq-taynil tachun yu alin y va yucha p'unaj kujchoqota la ixlhinin. Xlhiyucha por

tachun, yucha apalay ay junita. ¹⁹ Tachun ixjatsukunti ni Dios val la ixjatsukunti ni Cristo, va chuncha lhipa'inil Dios. ²⁰ Por yu makal ni Cristo, Dios naul ni tachun yu alin ox katataulal kun yucha. Nil ni Cristo y pumaj'al ixjak'alna laka kurus, xlhi-yucha tachun yu alin lakamunukpa' ali lakt'iyau oxamaktaun taval kun Dios.

²¹ Uxiknank'an maqancha vachu' la maqati ixt'aunat'ik y t'alaxkaynin ix'unt'a-t'ik kun Dios por yu ixp'ast'ak'at'ik ali yu ixmak'ayat'ik. Pero Dios makal para ox katalaqs'tinchoqon ni uxiknan. ²² Chuncha val por yu makal Cristo la ixlakatunaj tejkan nil. Va para ixlapanakni Dios k'a'unt'ik para ox k'a'unt'ik la metsukuntik'an. Ex jantu lay matichun katamuk'anin laqtaqal tejkan yucha katalha'anan la ixtalaka'ukxpu' Dios. ²³ Xlhiyucha maqsk'iniiy kat'aylhpi'int'ik la milhakapu'atk'an y laqp'aysnin k'a'unt'ik. Ex jantu k'ama-k'aunt'ijlat'ik yu ox p'akxan'iyat'ik yu tamasunin tejkan asmakt'ik ni ox chivinti. Ni anchanu chivinti laqpute'ekan talakachux lakamunukpa'. Dios kixtaqnil ni kit'in ni aniy lhitaqatsa yu ixlaxqute'eka.

Ni Pablo laktapatsaniy yu talhakapu'an

²⁴ Chavaycha klhi'achantajuy ni klamaqanlqajnan la kilakatunaj por uxiknan. Ixlapanakni Cristo maqsk'iniiy maqanlqajnanau. Chavay klaqayntsaiy lati yu maqanlqajnat. Ikmaqanlqajnan por ixlapanakni Cristo yu tacha ixlakatunaj tajunita. ²⁵ Kit'in kval ix'oqxtamatk'an yu talhakapu'an. Va yucha ni lhitaqatsa yu kimaqxtaqnil Dios por uxiknank'an para kaklaqpute'el tachun ixchivinti. ²⁶ Ni aniy chivinti la maqancha ixmaqsaqta ni Dios pero chavaycha lakmamispanitacha ixlapanakni. ²⁷ Ni Dios tamamispaniputun uxiknan yu jantu israelitas k'a'unt'ik ni anchanu chivinti yu vamun yu' ox, yu jantu ixmispakan. Ni anu chivinti najun ni Cristo va kun uxiknan. Xlhiyucha p'akxan'iniiyat'ik ni oxixtu yu kataxtaqniyan. ²⁸ Klhichivinanau y chuncha klakchivijvayau tachun ni lapanakni. Ox klakmasuniyau kun tachun jatapastak'ati para jantu tu'uchun kats'anqal la ixjatsukuntik'an

kun Cristo Jesús. ²⁹ Va yucha klhilaqlatatsay kun tachun ixtap'asta ni Cristo yu kixtaqniy.

2 ¹ Va knajun kak'ats'at'ik ni la p'ays iktapatsay por uxiknank'an ali yu tavalanal laka putaulan Laodicea y por tachun ni lapanakni yu talhakapu'an yu jantuka' taks kintalaqs'in. ² Chuncha iktapatsay para kalaksast'inikal ixjalhanutk'an y ch'antaun katalapaxkal para jantu tu'uchun kats'anqal la ixjatapastak'atk'an. Vachu ayaj iktapatsay para chuncha lay katamalaqasil ni anu chivinti yu kimPay Diosk'an ixmaqsaqta yu lhichiviniy Cristo. ³ La ixjatsukunti ni Cristo alin tachun yu apalay ixlaxqmiti yu jatapastak'ati kun yu jatalaniti. ⁴ Chuncha klajunau para jantu matichun katamakanun mas va qal'oxicha kachiviniy pero jantu laqsaval yu najun. ⁵ Mas jantu klat'ataulcha'au la kilakatunaj pero la kijatapastak'ati va tacha klat'ataulcha'au ch'antaun kun uxiknan. Va klhi'achantajuy ni ijk'atsay va ch'antaun unt'at'ik y la p'ays lhak'ap'up'inat'ik ni Cristo.

⁶ Chuncha tacha tejkan la'a'it'ik ni Cristo Jesús miJalhachimo'onuk'an, chuncha kat'i'ukxunt'ayat'ik ch'antaun kun yucha. ⁷ Ch'antaun kun yucha k'a'unt'ik, ox kat'aylhpi'int'ik kun yucha. K'at'ap'asnit'ik milhakapu'atk'an chuncha tacha tamasunitan. Chuncha apalay katalhaval milhakapu'atk'an y va si kaxt'aqnit'ikcha lhimalaqpuchuncha ni Dios.

La ixjatsukunti ni Cristo alin tachun yu maqsk'iniiy

⁸ K'alhist'ajk'ant'ik para jantu matichun katalhimakanun por yu talaniy ixlax'amank'an, por chivinti yu tacha laj'oxi kaval pero jantu laqsaval. Yucha vamun ixputsukk'an lapanakni ali xajatakpastak'ati aniy lakamunukpa'. Jantu ch'antaun kataval kun Cristo. ⁹ Tachun yu Dios junita va la ixlakatunaj ni Cristo alin'ojota. ¹⁰ Va por Cristo lhitaun'oyat'ik tachun yu maqsk'iniiy. Yucha va xa'aqtsul tachun yu lhachimo'onun ali

tachun yu talhit'ajun tap'asta lakt'iyan.

¹¹ Uxiknan va tacha k'axvililich'uk'up'u-xnik'ant'ik yu talaqalhin la metsukuntik'an. Jantu vali'iy lapanaki kaval yu taxvililichuk'up'uxnin. Va Cristo yu taxvililichuk'up'uxnin. ¹² Tejkan aqch'aj'aut'ik va tacha kat'a'aknut'ik ch'antaun kun yucha. Lhak'ap'up'int'ik ni Dios yu majkujuchochol la ixlhinin. Xlhiyucha va tacha t'at'ak'ukch'o'ot'ik ch'antaun kun yucha. ¹³ Tejkan jantuka' ixak'anik'anat'ik mintalaqalhint'an, va ixt'i'ukxuyanant'ik laka lhinin. Ex ni Dios taxaqnin sast'i jatsukunti y tamalaqmixinin mintalaqalhint'an. ¹⁴ Ix'alín yu ixlhaaniyau por jantu ixmakayau yu ixlhinauncan, pero yucha malaqmixi'ol. Va tacha aqxtaun jalhiki ta'an istsoqmulakanta kilhaanintik'an. Yucha maxtl y xtukmuk'al laka kurus. ¹⁵ Va lakmaxtuni'ol ixtap'astk'an ni xa'ukxtinin lakamunukpa' ali yu talhachimo'onun y jalakmalakat'unil. Laka kurus ni Cristo jalaqmaqalhajal, ex va tacha jalaqmaqalchoqonil tacha tach'inin.

¹⁶ Xlhiyucha jantu matichun lay tamuk'aniyan laqtaqal por yu uyat'ik ali yu oqyat'ik. Vachu jantu lay tamuk'aniyan laqtaqal por yu talhinajun israelitas xak'atanax, por yu talhinajun tamin malkuyu', o por yu lay k'amak'at'i xajulchan jastaknati. ¹⁷ Yu anchanu ixlhinauncan yu tasul pu'unaj va tacha ixmaqts'ansilaqa ni Cristo yu ixminta, pero yu laqsaval maqsk'iniyatt'ik vamun ni Cristo. ¹⁸ Jantu k'amak'aunt'ik katamakanun y katamaxtunin milhijhajat'k'an anchanu lapanakni. Yu'uncha va tacha lakst'unij lakmakakan y vachu' tato'oyay angeles. Yu'uncha vamun talhichiviniy yu jantu laqsaval katalaqt'sil y laj'ay jalakmakakan ixlaq'amank'an. Tapa-staknan tacha vali'iy lapanakni.

¹⁹ Yu'uncha jantu ch'antaun tat'ajun kun Cristo. Ni yucha xa'aqtsul y lhakapu'anau, kijnan va ixlakatunaj. Yucha kintaxtaqniyan tap'asta y Dios makay para ka'aynlhi kilhakapu'atk'an. Va tacha taun lakatunaj ajin tejkan ixjasivikna malakatanuy tap'asta y ox laqxt'o'a ta'an talach'apata.

²⁰ Uxiknank'an va tacha k'anit'ik ch'antaun kun Cristo xlhiyucha jantucha talhichimo'oyan xa'ukxtinin aniy lakamunukpa'. ¿Vali'iycha t'aunat'ikcha tacha vananaj katalhichimo'on yu xa'ukxtinin aniy lakamunukpa'? ²¹ Yu'uncha tanajun: “Jantu kach'ap'a yu aniy, jantu k'a'ut'i yu anu', jantu klakch'ap'a yu avint'i.” ²² Tachun yu chuncha lhinauncan va lhichiviniy yu niman tatantsiniy tejkan k'a'ut'i. Ni anchanu va yu talhinajun y tamalaninin yu vali'iy lapanakni. ²³ Ni anchanu chivinti lhijunticha ox jatapastak'ati y lhijunticha laqsaval ox para kato'oyau Dios y para kamalakat'unikau y para laqatap'asta kalhistakvi kilakatunajk'an. Pero ni anchanu chivinti jantu kinta'aqtayjuyan para kamakajuu yu talaqalhin yu makaputunau.

3 ¹ Uxiknank'an va t'a'ost'aulat'ikcha ch'antaun kun Cristo. Xlhiyucha k'alakxk'aut'ik yu alin lakt'iyan ta'an vilchal ni Cristo la ixlhijakanaj Dios ta'an lay to'oyakan. ² K'alhilakp'ast'aknant'ik yu alin lakt'iyan jantu yu xanavin aniy lakamunukpa'. ³ Uxiknank'an va tacha k'anit'ikcha y chavay maqsaq ma'anik'ant'at'ikcha metsukuntik'an kun Cristo la ixtalaka'ukxpu' Dios. ⁴ Ni Cristo va yucha yu taxaqniyan jatsukunti. Tejkan katasuya' ni Cristo ex metsukuntik'an vachu katatasuya' kun tachun ix'oxixtu.

Ni sast'i jatsukunti ali yu at'ali jatsukunti

⁵ K'amak'aumaqnit'ikcha tachun yu jantu laj'oxi la metsukuntik'an yu xanavin aniy lakamunukpa'. Jantu kat'at'amat'ik matichun yu jantu minavink'an. Jantu k'amak'at'ik yu jantu laj'oxi yu ayaj mak'ap'ut'unat'ik. Jantu k'alalhavap'ut'unt'ik mimaqalitik'an tus va tacha midiosk'an k'amak'at'ik. ⁶ Tachun yu aniy yu tamakay lapanakni, va por yucha lhitalqaman ni Dios. Xlhiyucha jamalaqachaniy maqanlqajnati tachun yu jantu taqalasmata'. ⁷ Vachu

uxiknank'an chuncha ixmak'ayat'ik tejkán chuncha ixjunita mimpusukuk'an. ⁸ Pero chavay k'amak'ant'ikcha tachun yu inchine': yu lhilukuj, yu talqaunti, yu jaxkayanti, yu jakiltayanti, yu yu laqxtuqnu' chivinti yu taxtuy la minkilnak'an. ⁹ Jantu k'alamanunit'ik jalaklkanti, chavay maxt'unik'ant'at'ikcha yu at'ali' jatsukunti kun tachun yu p'unaj ixmak'ayat'ik. ¹⁰ Chavay lhilak'ayanant'ikcha kun yu sast'i jatsukunti. Lhilihuy tasast'iyat'ik para apalay chuncha k'a'unt'ik tacha Dios yu tamakan, tus ox k'amisp'at'ik. ¹¹ Ta'an alin yu aniy sast'i jatsukunti jantucha makayau kuenta incha qayntaun lapanaki va griego u israelita. Jantucha makayau kuenta incha va kaxvililich'uk'unik'ant'ik u incha jantu, u to'oxtaycha machaqa', u incha jantu k'alhits'uk'u jatalaniti, u incha va oqxtamati, u incha va x'aman tapatsay. Vamun makayau kuenta ni Cristo yu jamanavin tachun. Yucha alinta la ixjatsukunti-k'an tachun ixlapanakni.

¹² Ni Dios talaksakni para ixlapanakni k'a'unt'ik y tapaxkayan. Xlhiyucha k'alamap'aynit'ik, ox k'alalhip'int'ik, k'amalak'at'unik'ant'ik, jantu k'alamak'anit'ik tu'uchun laqatap'asta, y k'ama'ant'aulat'ik. ¹³ K'alama'ant'aqnit'ik y k'alamaqmixinit'ik incha tu'uchun lamak'aniyat'ik. Tacha Cristo tamalaqmixinin vachu va chun kalamalaqmixinit'ik. ¹⁴ Yu apalay maqsk'ininy va kalap'axk'at'ik. Chuncha va ch'antaun k'a'unt'ik la metsukuntik'an. ¹⁵ Ni Cristo oxamaktaun tamakan, ex chavaycha chuncha k'ap'ut'aulat'ik la mijatapastak'atk'an. Va xlhiyucha laksak'ant'ik para ch'antaun k'a'unt'ik. K'alhip'axk'alaqts'inint'ik.

¹⁶ Ni chivinti yu lhichiviniy ni Cristo va yucha ox katanul la mijatsukuntik'an. Yucha k'alamasunit'ik y k'alach'ivivat'ik kun ox jatapastak'ati. K'amilp'at'ik salmos ali milpati y lhito'oyakan Dios ali milpati y tamsulhaaniyan ni Espiritu Santo. Ex chuncha kun chux la melhanutk'an k'axt'aqnit'ik lhimalaqpuchuncha kiJalhachimo'onuk'an Jesucristo. ¹⁷ Tachun yu k'amak'at'ik o yu k'anaunt'ik, k'amak'at'ik la ixtaqa'uti ni

kiJalhachimo'onuk'an Jesucristo. Va por yucha k'alhixt'aqnit'ik lhimalaqpuchuncha ni Dios.

Yu maqsk'ininy k'alamak'anit'ik

¹⁸ Uxiknank'an yu xanatin unt'at'ik, kat'o'oyat'ik mixapayk'an. Va chuncha tapaxtoqniy ixlapanakni ni Jalhachimo'onu' Jesucristo. ¹⁹ Uxiknank'an yu jo'akna unt'at'ik k'ap'axk'at'ik mixanatik'an. Jantu aqtaun kalhimaqch'ap'ut'ik.

²⁰ Uxiknank'an yu s'at'an unt'at'ik k'a'al'asmakt'ik mimpayk'an kun minat'ik'an, va chuncha lhipa'ininy ni Jalhachimo'onu' Jesucristo. ²¹ Uxiknan yu japayan unt'at'ik jantu kalakmaluk'ujlat'ik mes'at'ank'an para jantu kataxkanil ixjalhanutk'an.

²² Uxiknank'an yu oqxtamatin unt'at'ik k'a'alasmakt'ik mi'ukxtinink'an yu aniy lakamunukpa'. K'alakt'ap'ats'anit'ik jantu vamun tejkán katatsukun laqts'inin y jantu vamun por ox kalaqts'inp'ut'unk'ant'ik. Va kalakt'ap'ats'anit'ik kun tachun mi'achatk'an, va tacha k'at'o'oyat'ik Dios. ²³ Mas va tisuncha yu k'amak'at'ik, k'at'ap'ats'at'ik kun tachun mi'achatk'an tacha kats'uk'ut'ik lhilaqltapatsanin kiJalhachimo'onuk'an y jantu yu vali'iy lapanaki. ²⁴ K'ats'ayat'ikcha ni kiJalhachimo'onuk'an Jesucristo kataxtaqniyan milhilhajatk'an yu tapaxtoqniyan. Va kiJalhachimo'onuk'an yu t'ap'ats'aniyat'ik. ²⁵ Yu tamaka'alhiy yu jantu laj'oxi, katalaqa'iya' yu jantu laj'oxi por yu tamakal. Dios va mustaun jamakay tachun lapanakni.

4 ¹ Uxiknank'an yu ukxtinin unt'at'ik va ox k'amak'at'ik chuncha tacha yu laqsaval tapaxtoqniy mi'oqxtamatk'an. K'ats'ayat'ik ni vachu' alin mi'ukxtink'an lakt'iyán.

² Ox k'at'aylhip'int'ik t'achivinin Dios kun tachun mijatapastak'atk'an y k'axt'aqnit'ik lhimalaqpuchuncha. ³ Vachu' kask'int'ik Dios por kijnank'an para chuncha kiJalhachimo'onuk'an kintamalaqlti'anin kilakatink'an. Ex lay kaklaqpute'eu ni chivinti yu ixmaqsqaqma'akanta yu lhichiviniy Cristo. Va

xlhiyucha iktanun laka pach'in. ⁴ Vachu k'ask'int'ik para ox kaklhichivinil yu klaq-pute'ey, tacha kimpaxtoqniy kakchivinil.

⁵ Ox k'at'i'ukxunt'ayat'ik kun yu jantu talhakapu'an. Ox k'alakp'ast'aknant'ik para jantu vali'iy kats'anqal mijulchank'an. ⁶ K'alakt'ach'ivinint'ik kun chivinti yu ox kalhixajchalcha, yu katalhipa'inil. Ex chuncha k'amisp'ayapitik tacha maqsk'ininy k'alhi'alt'aych'o'ot'ik qayntamin.

Ni Pablo jamalaqachaniy jamastak'anti

⁷ Tachun yu iktapasay kit'in ancha katamak'atsaniyan ni Tikiko yu k'achaniy tacha kilaqaj y yu ki'aqjayjunu'. Yucha ox taylha'an y ch'antaun iktapatsaniyau ni kiJalhachimo'onuk'an. ⁸ Va yucha klama-laqachaniyau para k'ak'ats'at'ik tacha k'alintaucha para katama'ayajnin melhanutk'an. ⁹ Vachu kat'a'antachal ni Onésimo yu kint'alaqajjunk'an yu ox taylhaaniy y yu k'achaniyau. Yucha va mint'amachaqak'an junita. Yu'uncha kata-mak'atsaniyan tachun yu iktapasayau aniy.

¹⁰ Tamastak'ayan ni Aristarco yu kint'atach'in y vachu' Marcos ixpuxniunti Bernabé. Uxiknank'an unk'ant'at'ikcha tacha maqsk'ininy k'amak'anit'ik. Incha ancha katalaqcha'an ox kala'a'it'ik.

¹¹ Vachu tamastak'ayan Jesús yu vachu' junkan Justo. Mas va lhuucha alin yu israelitas pero vamun yu'uncha

kintat'atapatsay para kalaqpute'ekal tacha lhachimo'onun ni Dios. Yu'uncha ox kintamalaka'ulata.

¹² Vachu aniy tamastak'ayan Epafras yu ix'oqxatamati Cristo y mint'amacha-qak'an junita. Yucha va tacha sk'incha Dios kun tachun ixtap'asta para apalay ka'ayn'al milhakapu'atk'an y para k'amaqxt'aqk'ant'ik tachun yu najun Dios. ¹³ Kit'in klajunau ni ijk'atsay ni Epafras va pastak'uy por uxiknank'an y por tachun yu talhakapu'an laka putaulan Laodicea ali laka putaulan Hierapolis. ¹⁴ Vachu' aniy tamastak'ayan Lucas yu doctor junita yu achaniyau y vachu' Demas.

¹⁵ Uxiknank'an vachu k'amast'ak'a-t'ik yu talhakapu'an Jesucristo laka putaulan Laodicea. Vachu k'amast'ak'a-t'ik Nimfas y tachun yu talhakapu'an yu tataqxt'o'a la ixchaqa'. ¹⁶ Tejkan k'ap'ut'e'e'oyapitik ni aniy karta k'alakmap'a-sanit'ik yu talhakapu'an laka putaulan Laodicea para chuncha vachu' katapute'el. Vachu k'ap'ut'e'et'ik ni karta yu ancha talhit'aunachal. ¹⁷ Ka'unapitik ni Arkipo para ox kamaka'ol ni lhitapatsa yu xtaqnil ni Jalhachimo'onu' Jesucristo.

¹⁸ Kit'in kPablo klamastak'a'oyau. Aniy klats'oqniyau kintaqa'uti kun la kimaka'. Kap'ast'akt'ik ni kit'in va ktach'in kunita. Katamapaynin ni Dios. Chuncha kavalcha.